

Peqqissutsimut Ataatsimiititaliaq

### **Imm. 53-imut, peqqinnissaqarfiup sullissineri pillugit peqqussutip allangortinneqarnissaanik siunnersuummut apeqqtinut akissutit**

Immikkoortup 53-ip, peqqinnissaqarfiup sullissineri pillugit peqqussutip allangortinneqarnissaanik siunnersuutip siullermeerneqarnerani ajornartorsiutit saqqumertut pillugit Peqqissutsimut Ataatsimiititaliamut allakkatigut akissuteqarnissara neriorsuutigaara.

Inuit Ataqtigiit, Atassut aamma Kattusseqtigiit Partiiat allangortitsinissamik siunnersuummut tamakkiisumik isumaqataapput, tamannalu nuannaarutigaara.

KANUKOKA tusarniaanermut akissuteqarsimanersoq Siumup apeqqtigaa. Akissuteqanngillat. Tusarniaanermut akissutigineqartut tamaasa Naalakkersuisut nassuiaatinut ilannguppaat. Tusarniaaffigineqartut sorliit akissuteqarsimannginnersut allanneqarsimasuuppat immaqa nassuiaatit erseqqinnerusimassagalarput. Tamanna tusaatissatut tigunearpoq, taamaalilluni kikkut tusarniaanermut akissuteqarsimannginnersut siunissami nassuiaatinut ilanngunneqartalissallutik.

Akit aalajangersarneqarnissaat pillugu isumaqatigiinniarnerni KANUKOKA-p ilanngunneqarnissaa Siumup piumasaraa. Ilimagaara paaqqinniffinni inissanut akinik aalajangersaaneq tamatumani pineqartoq.

Peqqinnissaqarfimmi sullissinerit atuisullu akiliuteqartarnerat pillugit nalunaarummi nutaami akit qanoq naatsorsorneqartarnissaat aamma taakku KANUKOKA-lu isumaqatigiinniutigineqarnissaat allaqqassaaq.

Utoqqarnik paaqqinniffiit pillugit Inatsisartut peqqussutaanni nr. 11-mi, 30. oktober 1998-imeersumi malittarisassani akit KANUKOKA-lu isumaqatigiinniutigineqarnissaat aamma allassimavoq.

Peqqinnissaqarfiup sullissimeqarfiini paarineqarnermut akiliutinut tunngatillugu Utoqqarnik paaqqinniffiit pillugit Inatsisartut peqqussutaat nr. 11, 30. oktober 1998-imeersoq naapertorlugu paaqqinniffinni inissanut ullumikkut akiliuteqartoqartarpoq. Akinilli aalajangersaanermi peqqinnissaqarfiup aningaasartuutivii ersersinneqartussaapput. Napparsimasut paarineqartut ilarpasui ima paaqqutarisassaasartigaat ullup unnuallu ingerlanerani nal.ak. arfineq pingasut sinnerlugit isumassorneqartariaqartarlutik, tamannalu ukiut aqqanillit-aqqaneq marluk matuma siorna akinik

12.10.2006  
J.nr. 45.04.01

Postboks 1160  
3900 Nuuk  
Oq/tel +299 34 50 00  
Fax +299 32 55 05  
peqqip@gh.gl  
www.nanoq.gl/peqqik

aalajangersaanermi ilanngunneqanngilaq. Tamanna malittarisassani nutaani ilanngunniarneqarpoq, taamaalilluni napparsimasunut nalinginnaasumik paaqqutarisarialinnut immikkut akeqartitsisoqalertussaalluni kiisalu napparsimasunut paaqqutarisariaqarnerusunut allatut aamma akeqartitsisoqalerluni.

Innuttaasut namminneq akiliisinnaasariaqarnerannut tunngatillugu tamanna taamaallaat sivikinnerusumik qasuersaanermi atuutissaaq. Taanna ilaqutariinnut inummik paaqqutarisarialimmik paaqqinnittunut neqeroorutaavoq. Ilaqutariit paaqqinninnerminni qasusoorunik feerissagunilluunniit kommune ilanngutinngikaluarlugu qasuersaartinneqarnissaminnut periarfissaqarput. Ilaqutariit qasuersaartinneqarnissaminnut akissaqanngitsut qasuersaartinneqarnermut kommunimut akileeqqusisinnaapput. Kommunimut iluaqutaasortaa tassaavoq ilaqutariit inummut paaqqutarisarialimmut pineqartumut ataavartumik inissamik ujaasissunneqasannginnerat. Neqeroorutip taassuma arlalippassuartigut atorneqartarnissaa naatsorsuutigineqanngilaq, periarfissaavorli.

Kommunit ilarpaalussui peqqissaanermi atortussaminnik, ikiuutiniq allanillu peqqinnissaqarfik aqqutigalugu pisiortortarmata peqqinnissaqarfiullu sullissiviutaani napparsimasunik paaqqutaqartitsimmata isumaqatigiissutinut piunasaqaatit pillugit nalunaarutit tunngavilikkat kommuninut aningaasartuutaanerussanngillat, peqqinnissaqarfimmi isumaqatigiissuteqannginnermi piunasaqaatit sorliit naammassineqartussaanerannik ersersitsissallutik. Erseqqissarneqassaaq pisussaaffiginagu peqqinnissaqarfik taamatut sullissisarmat. Sullissinerit taakku pisiarinissaannut kommunit pisussaaffeqanngillat.

**Demokraatit** sooq Naalackersuisut siunnersuutip peqqinnissaqarfimmut aningaasaniq sipaarutaasussaannginneranik isumaqarnerannut tunngavilersuisoqarnissaa kissaatigaat.

Peqqinnissaqarfik sullissinernut sorlernut akiliisitsisarsinnaanersoq siunnersuummi erseqqissarneqarpoq. Aningaasat taakku suliaqarfinit sullinneqartunit akileqqunegareerput, tamannali peqqinnissaqarfiup sullissinernut taakkununnga akiliisitsinisamat piginnaatitaaneraniq eqqartueqqaarani pineq ajorpoq, tassami sullissineq pillugu peqqussummut nassuiaatit amigarluinnarmata.

Sipaarutiniq oqalunnermi peqqinnissaqarfiup uninngasunut paaqqutarisarialerujussuarnut aningaasartuutivimminik matussusiiffiqineqarnissaa pineqarpat tamanna Naalackersuisut sipaarnertut isiginngilaat. Peqqinnissaqarfik uninngasunut paaqqutarisarialinnut taakkununnga tunngaveqanngitsumik aningaasartuuteqartarput, tamannalu inatsisitigut tunngavissaqanngilaq. Peqqinnissaqarfiup maanna kommunit uninngasuutaannut paaqqutarisarialerujussuarnut aningaasartuutiginerusai peqqinnissaqarfimmut killiliussatut aningaasaliissutinit, napparsimasunik katsorsaanerimut, peqqinnissamik siuarsaanermut il.il. atorneqartussanit tiguneqartarput.

Ikiuutit tamarmik pitsaasuusutut naqissuserneqarneq ajorsimagunartut, taamaattumillu ikiuummik pineqartumik atuisumut tapiissuteqartoqarsinnaagunangit-

soq Demokraatit ilimagaat. Naalakkersuisunut ilaasortaq tamatumunnga qanoq oqaasissaqarpa?

Nassuiaatini allassimavoq ikiuutit peqqinnissaqarfiup tamakkiisumik ilaannakort umilluunniit akiligaasa pitsaassusaat peqqinnissaqarfimmit nakkutiginiarneqartoq. Taamatut nakkutiginninneq pissaaq peqqinnissaqarfiup Danmarkimi tuniniaasunit peqqinnissaqarfiup pitsaassutsimik qularnaariffigisaanit ikiuutinik pisisarneratigut.

Peqqinnissaqarfiup innuttaasut taamaallaat tuniniaasunut toqqakkanut innersuut-tarpai. Innuttaasut tuniniaasartumut peqqinnissaqarfimmit akuerisaasumut inner-suunneqarsimasut taamaalillutik tamatigut qularnaarsinnaavaat ikiuineq peqqinnis-saqarfimmit tamakkiisumik ilaannakortumilluunniit akilerneqassasoq.

Tamatuma saniatigut § 25-p allangortinneqarnissaa Demokraatit nangaanar-toqartippaat. Demokraatit isumaqarput aaqqissuussineq kommuninut utoqqaat illuini naammattunik inissaateqanngitsunut imaluunniit immikkut paaqqtarisarialin-nik utoqqaat illuini najugaqartitsinissaminnut ilinniarsimasunik sulisus-saqanngitsunut tussasoq.

Matumani erseqqissassavara kommunit paaqqtarisarialinnik isumaginninnissamut pisussaaffeqarmata, paaqqtarininnissap qanoq annertutiginera apeqqutaatinnagu. Soraarnerussutisiallit taakku ilaatigut peqqinnissaqarfiup sullissiveqarfiini inis-saqartinneqartarnerat peqqinnissaqarfimmit sullissineruvoq peqqinnissaqarfiup sullississutigissallugu pisussaaffiginngisaa.

Soraarnerussutisiallit paaqqtarisariallit najugaqarnerannut akinik isumaqatigiinni-arnermut KANUKOKA-p peqataasarnissaanut tunngatillugu Siumup apeqqutaanut akissut qulaaniittoq innersuussutigissavara.

Neriuppunga taamatut akissuteqarlunga ajornartorsiutit siullermeerinninnermi saqqummiunneqartut pillugit paasissutissiillunga. Allaniq paasiuminaatsoqarpat akinissannut piareersimavunga.

Inussiarnersumik inuulluaqqusillunga

Asii Chemnitz Narup